



МОНГОЛ УЛСЫН
ЭРҮҮЛ МЭНДИЙН САЙДЫН ТУШААЛ

2014 оны 02 сарын 24 өдөр

Дугаар 55

Улаанбаатар хот

Эмнэлгийн тусламж, үйлчилгээний
хөгжлийн бодлого батлах тухай

Эрүүл мэндийн тухай хуулийн 8 дугаар зүйлийн 8.1.2 дахь заалтыг үндэслэн эмнэлгийн тусламж, үйлчилгээний хөгжлийг хангах зорилгоор ТУШААХ нь:

1. “Эмнэлгийн тусламж, үйлчилгээний хөгжлийн бодлого”-ыг хавсралтаар баталсугай.
2. “Эмнэлгийн тусламж, үйлчилгээний хөгжлийн бодлого”-ыг үе шаттайгаар хэрэгжүүлэх арга хэмжээний стратеги, төлөвлөгөөг 2014 оны 3 дугаар улиралд багтаан боловсруулж батлуулахыг Бодлого, төлөвлөлтийн газар /Ц.Цолмонгэрэл/-т, бодлогын хэрэгжилтийг нэгдсэн удирдлага, зохицуулалтаар хангаж ажиллахыг Бодлогын хэрэгжилтийг зохицуулах газар /Я.Буянжаргал/-т, орон нутгийн түвшинд бодлогын хэрэгжилтийг хангаж ажиллахыг аймаг, нийслэлийн Эрүүл мэндийн газрын дарга нар, эрүүл мэндийн байгууллагуудын дарга, захирал, ерөнхий эмч нарт тус тус үүрэг болгосугай.
3. Энэхүү тушаалын хэрэгжилтэд хяналт тавьж ажиллахыг Төрийн нарийн бичгийн дарга /А.Эрдэнэтуяа/-д үүрэг болгосугай.

САЙД



Н.УДВАЛ

080110

Эрүүл мэндийн сайдын
2014 оны 04 сарын 24 өдрийн
47 дугаар тушаалын хавсралт

ЭМНЭЛГИЙН ТУСЛАМЖ, ҮЙЛЧИЛГЭЭНИЙ ХӨГЖЛИЙН БОДЛОГО

Нэг. Нийтлэг үндэслэл

Эмнэлгийн тусламж, үйлчилгээний хөгжлийн бодлого нь Монгол улсын иргэн шаардлагатай үедээ орчин үеийн эмнэлгийн тусламж, үйлчилгээг цаг алдалгүй, чанартай, аюулгүй, эрсдэлгүй авах нөхцлийг бүрдүүлэхэд оршино. Энэ бодлогыг 2014-2023 он хүртэл хэрэгжүүлж, дараах үр дүнд хүрнэ. Үүнд:

1. Иргэн эх орондоо эмнэлгийн эрсдэлгүй, чанартай тусламж, үйлчилгээг шаардлагатай үедээ цаг алдахгүй авах, өвчин эмгэгээ эрт үед нь илрүүлж, оношлуулах, эмчлүүлж, өвчин эмгэг хүндрэх, архагшихаас урьдчилан сэргийлэх боломж нэмэгдэж, тусламж, үйлчилгээний хүлээгдэл чирэгдэл буурна.
2. Эмнэлгийн тусламж, үйлчилгээг стандартын дагуу үр дүнтэй, чанартай, аюулгүй, эрсдэлгүй үзүүлэх нөхцөл бүрдэж, эмнэлгийн мэргэжилтний хөдөлмөрийг бодитой үнэлэх, тогтвортой ажиллах нөхцөл бүрдэнэ.
3. Эмнэлгийн тусламж үйлчилгээний төсөв, санхүүгийн нөөцийг бодитой төлөвлөх, ил тод, үр ашигтай зарцуулах нөхцөл бүрдэж, төр, хувийн хэвшлийн харилцан бие биенээ дэмжсэн үр дүнтэй түншлэлийг бий болно.

Энэхүү баримт бичгийг үндэслэн гарах стратеги төлөвлөгөө, хөтөлбөр болон бусад хууль эрх зүйн шийдвэрүүдээр бодлогын хэрэгжилтийг хангана.

Хоёр. Тулгуур зарчим

Монгол улсад эмнэлгийн тусламж, үйлчилгээг үзүүлэхэд дараах тулгуур зарчмыг баримтална. Үүнд:

- Иргэдийн эрүүл мэндийн байдал, өвчин эмгэгийн төрөл, оршин суугаа газар, нас, хүйс, боловсрол, бэлгийн чиг хандлага, үндэс угсаа, хэл соёлын ялгаанаас үл хамааран тэгш, хүртээмжтэй хүргэх;
- Чанар, аюулгүй байдлыг хангасан, нотолгоонд суурилсан технологийг ашиглах;
- Хүн амын эрүүл мэндийн эрэлт, хэрэгцээнд тулгуурласан байх;
- Өвчин эмгэгийг эрт илрүүлж, чанартай, шуурхай, тасралтгүй, үр дүнтэй эмчлэх;
- Санхүүжилтийн тогтвортой, үр ашигтай, ил тод, хариуцлагатай байдлыг хангах;
- Төр, хувийн хэвшлийн түншлэлд хамтрагч талуудын оролцоог адил тэгш хангах;

Гурав. Алсын хараа

Энэхүү бодлого нь хүн амын эрүүл мэндийн эрсдэл, өвчлөл, нас баралтыг бууруулж, дундаж наслалтыг уртасган, эмнэлгийн тусламж, үйлчилгээнд иргэдийн сэтгэл ханамжийн түвшинг нэмэгдүүлэхэд чиглэнэ.

Дөрөв. Эрхэм зорилго

Монгол улсын иргэн бүрт шаардлагатай үед нь анагаах ухааны нотолгоонд суурилсан, чанартай, аюулгүй, үр дүнтэй эмнэлгийн тусламж, үйлчилгээг залгамж чанартай, тасралтгүй, тэгш, шударга, чирэгдэлгүй үзүүлэхэд оршино.

Тав. Зорилго

Эмнэлгийн тусламж, үйлчилгээг хүн амын эрэлт, хэрэгцээнд нийцсэн, чанар, аюулгүй байдлыг хангасан, ил тод, хариуцлагатай, үр дүнтэй, үйлчлүүлэгч төвтэй эмнэлгийн тусламж, үйлчилгээний тогтолцоо болгон хөгжүүлнэ.

Зургаа. Бодлогын зорилт

1. Эмнэлгийн тусламж, үйлчилгээний зохион байгуулалтыг хүн амын эрэлт хэрэгцээ, суурьшил, нягтрал, хүн амын өвчлөлийн чиг хандлагад нийцүүлэн оновчтой болгож, тусламж, үйлчилгээний хүртээмжийг нэмэгдүүлнэ.
2. Эмнэлгийн тусламж, үйлчилгээний чанар, аюулгүй байдлыг хангаж, эрсдлийг бууруулна.
3. Эмнэлгийн тусламж, үйлчилгээнд үйлчлүүлэгч төвтэй үйлчилгээний соёл, харилцаа, хандлагыг төлөвшүүлнэ.
4. Эрүүл мэндийн байгууллагуудын засаглалыг сайжруулж, санхүүгийн удирдлагын хариуцлага, ил тод байдлыг нэмэгдүүлнэ.
5. Эмнэлгийн тусламж, үйлчилгээний найдвартай, тогтвортой үйл ажиллагаа, гүйцэтгэл, чанар, үр дүнг дэмжсэн санхүүжилтийн тогтолцоог бий болгоно.
6. Төр, хувийн хэвшлийн түншлэлийг эмнэлгийн тусламж, үйлчилгээний тэргүүлэх чиглэл, бодит эрэлт хэрэгцээтэй уялдуулан хөгжүүлнэ.

Долоо. Бодлогын чиглэл

1. Тусламж, үйлчилгээний зохион байгуулалт

1. Эмнэлгийн тусламж, үйлчилгээг эмнэлгийн анхан шатны, үндсэн болон төрөлжсөн мэргэжлийн тусламж, үйлчилгээ гэсэн хэлбэрээр үзүүлж, төвлөрлийг сааруулах арга хэмжээг үе шаттай авч хэрэгжүүлнэ.
 - 1.1 Эмнэлгийн анхан шатны тусламж, үйлчилгээ
 - 1.1.1 Эрүүл мэндийн анхан шатны тусламж, үйлчилгээг үзүүлж, эмнэлгийн тусламж, үйлчилгээний хаалга баригч болох өрх, сум, тосгоны эрүүл мэндийн төвийг сум, тосгон тус бүрт нэг, хот суурин газрын 6000-12000 хүн тутамд нэг байхаар зохион байгуулж, тусламж, үйлчилгээг өдрийн болон гэрийн эмчилгээ, асаргаа, сувилгаа, сэргээн засах, хөнгөвчлөх үйлчилгээний чиглэлээр өргөжүүлнэ.
 - 1.1.2 Алслагдсан болон газар зүйн саад бэрхшээлтэй нутагт оршин сууж буй иргэд, отрын малчид, уул уурхайн ажилчид, шинээр шилжин суурьшсан иргэд гэх мэт хөдөлгөөнт хүн амд иргэний бүртгэлийг үл харгалзан, оршин буй газартаа эмнэлгийн тусламж, үйлчилгээг авах эрх зүйн орчныг бүрдүүлж, тусламж, үйлчилгээний тэгш байдлыг хангана.
 - 1.1.3 Аймгийн төвөөс 100 км-ээс дээш алслагдсан болон газар зүйн саад бэрхшээлтэй сумдыг ойролцоо газар нутгаар нь 8000-аас дээш хүн амд нэг байхаар тойрог болгон аль хүн ам төвлөрсөн суманд нь сум дундын эмнэлгийг зохион байгуулж, эмнэлгийн анхан шатны болон үндсэн мэргэжлийн зарим тусламж, үйлчилгээг хослуулан үзүүлнэ.

1.2 Эмнэлгийн үндсэн мэргэжлийн тусламж, үйлчилгээ

- 1.2.1 Үндсэн мэргэжлийн тусламж, үйлчилгээг нэгдсэн эмнэлэгт тулгуурлан олон улсын жишигт хүргэн хөгжүүлэх бөгөөд өмчийн олон хэлбэрийн эрүүл мэндийн байгууллагатай ачаалал хуваалцах, тусламж, үйлчилгээний дутагдалтай хэсгийг нөхөх, орлуулах байдлаар хамтран ажиллана.
- 1.2.2 Орон нутгийн эрүүл мэндийн байгууллагуудыг үйл ажиллагааны нэгдмэл зохион байгуулалтад шилжүүлж тусламж, үйлчилгээний уялдаа холбоо, залгамж чанар, хүртээмж, тасралтгүй байдлыг сайжруулна. Зарим өндөр өртөгтэй тоног төхөөрөмж, дэмжих үйлчилгээг гэрээгээр хамтран ашиглах замаар нөөц ашиглалтыг сайжруулна.
- 1.2.3 Улаанбаатар хотын алслагдсан дүүрэг, аймгийн төв бүрт, хотын төвийн дүүрэгт 150 мянган хүн ам тутамд, аймгийн төвөөс алслагдсан бөгөөд хоорондоо 50 км-ээс ойр оршиж буй сумдын 20000-аас доошгүй хүн амд нэг байхаар тус тус тооцон нэгдсэн эмнэлгийг зохион байгуулж, үйлчлүүлэгч олон мэргэжлийн тусламжийг нэг цэгээс авах боломжийг бүрдүүлнэ.
- 1.2.4 Төв эмнэлэг, төрөлжсөн мэргэжлийн төвд үзүүлж буй зарим тусламжийг нэгдсэн эмнэлэгт үе шаттай шилжүүлж, хүүхэд, төрөх эмэгтэйчүүд, хавдар, арьс, сэтгэц, халдварт, гэмтэл, мэс засал, уламжлалт, эмнэлэг хүртэлх яаралтай тусламж, эмнэлгийн сэргээн засах, өдрийн, хөнгөвчлөх үйлчилгээний чиглэлээр чадавхийг нэмэгдүүлэн үндсэн болон зарим төрөлжсөн мэргэжлийн үйлчилгээг нэгдсэн эмнэлэгт хослуулан үзүүлэх боломжийг дэмжинэ.

1.3 Эмнэлгийн төрөлжсөн мэргэжлийн тусламж, үйлчилгээ

- 1.3.1 Төв эмнэлэг, төрөлжсөн мэргэжлийн төвүүдийг тухайн мэргэжлээрээ тусламж, үйлчилгээний хөгжлийг тодорхойлж, улсын хэмжээний лавлагаа, дүгнэлт гаргах, эмнэлзүйн удирдамж, стандарт, хөтөч боловсруулах, судалгаа шинжилгээ хийж, эмнэлгийн мэргэжилтэнг сургах, бусад эрүүл мэндийн байгууллагуудыг мэргэжил арга зүйн удирдлагаар хангах, зохицуулах чадавхийг бий болгож, хөгжүүлнэ.
- 1.3.2 Хэвтүүлэн эмчилдэг зарим бичил мэс засал, ажилбар, дурангийн мэс засал, туяа болон гемодиализ эмчилгээ, биопси болон бусад оношилгоо, эмчилгээг өдрөөр хийхээр зохион байгуулж, эмнэлгийн шаардлагагүй хэвтэлтийг одоогийн түвшнээс 30-аас доошгүй хувиар бууруулна.
- 1.3.3 Орчин үеийн шинжлэх ухааны дэвшилтэт технологи, инновацийг нэвтрүүлэх, өндөр мэргэжлийн олон улсын багийг ажиллуулах, үндэсний мэргэжилтнийг сургаж, чадавхижуулах замаар өндөр нарийвчлал, технологи шаардсан эмнэлгийн тусламж, үйлчилгээг эх орондоо үзүүлж, гадаадын ижил төстэй эмнэлгүүдтэй өрсөлдөх түвшинд хүргэнэ.
- 1.3.4 Алсын зайн оношилгоо, эмчилгээний үндэсний сүлжээг бэхжүүлж, иргэдийг орон нутгаасаа чанартай оношилгоо, эмчилгээ авах боломжийг нэмэгдүүлнэ.

2. Тусламж, үйлчилгээний чанар, аюулгүй байдал, эрсдэл

1. Эмнэлгийн тусламж, үйлчилгээг мэргэжлийн нэгдсэн удирдлагаар хангаж, тусламж, үйлчилгээний чанар, аюулгүй байдлын үндэсний зорилтуудыг боловсруулж, хэрэгжүүлнэ.
2. Эмнэлзүйн удирдамж, стандарт, хөтчийг ДЭМБ-ын зөвлөмж болон олон улсын нотолгоонд суурилсан арга технологиор баяжуулан, шинэчлэн боловсруулж, мөрдүүлнэ.
3. Оношилгоо, эмчилгээний ажилбарын эрсдэлээс урьдчилан сэргийлэх, үнэлгээ хийх, удирдах чадамжийг бэхжүүлж, эмгэг судлалын шинжилгээ, эмнэлзүйн тойрон үзлэг, хяналтын хуудсын ашиглалтыг хэвшүүлэх дотоод хяналтын цогц арга хэмжээг авч хэрэгжүүлнэ.
4. Эмнэлгийн мэргэжилтний мэргэжлийн алдааг доголдлыг үнэн зөв бүртгэх, урьдчилан сэргийлэх арга хэмжээг эрчимжүүлж, эмнэлгийн мэргэжилтний хариуцлагын даатгалд хамруулах асуудлаар эрх зүйн орчинг бий болгоно.
5. Эмнэлгийн тусламж, үйлчилгээнд хэрэглэх нэг удаагийн багаж, хэрэгсэл, халдваргүйтэл, ариутгалын бодис, багаж хэрэгслийн хангамж, ашиглалт, ариутгалын чанарын хяналтыг сайжруулж, эмнэлгээс шалтгаалсан халдвараас сэргийлэх арга хэмжээг эрчимжүүлнэ.
6. Эрүүл мэндийн байгууллагын магадлан итгэмжлэлийн үйл ажиллагааг бие даасан хөндлөнгийн байгууллагаар гүйцэтгүүлж, магадлан итгэмжлэлийг тусламж, үйлчилгээний төрөл, гүйцэтгэлтэй нь уялдуулж олгодог болгоно.
7. Болзошгүй гамшиг, онцгой байдлын үеийн эрсдлийн удирдлагатай уялдсан хөгжлийн төлөвлөлт хийх, эмнэлгийн тусламж, үйлчилгээний бэлэн байдал, хариу арга хэмжээ, тасралтгүй үйл ажиллагааг хангахын тулд бусад салбартай шуурхай хамтран ажиллах нөхцлийг бүрдүүлнэ.

3. Үйлчилгээний соёл, харилцаа хандлага

1. Үйлчлүүлэгчийг угтах, эргэх, лавлах, зөвлөх, оношлох, эмчлэх, сувилах, хөнгөвчлөх тусламж үйлчилгээний соёл, харилцаа, хандлагыг иргэдийн сэтгэлд нийцүүлэн сайжруулна.
2. Аливаа оношилгоо, эмчилгээ, үйлчилгээг үзүүлэх, эс үзүүлэх тухай шийдвэр гаргахад иргэнийг оролцуулж, тухайн үйлдэл, ажилбар, гарч болох эрсдэл, хүндрэлийн талаар үйлчлүүлэгчид урьдчилан тайлбарлах, зөвшөөрөл авах, мэдээллийн нууцыг хадгалах зохицуулалтыг сайжруулна.
3. Эмнэлгийн орчин дахь нийгмийн харилцаа, эмнэлгийн мэргэжилтэн, үйлчлүүлэгчдийн сэтгэл зүйн дарамт ачааллыг судлан, ёс зүй, харилцаа хандлагын зөрчилд хүргэж буй шалтгааныг тодорхойлж, ёс зүйн алдаа доголдлыг бууруулах арга хэмжээг эрчимжүүлнэ.
4. Эмнэлгийн дотоод гадаад орчны аюулгүй, эрсдэлгүй байдлыг сайжруулж, үйлчлүүлэгчийн нууцлалыг хадгалах, тав тухтай тайван орчинд үйлчлүүлэх боломж, нөхцлийг нэмэгдүүлнэ.

5. Эмнэлгээр үйлчлүүлэгчдийн сэтгэл ханамжийг үнэлэх нэгдсэн аргачлалыг бий болгож, эрүүл мэндийн байгууллага бүрт мөрдүүлэн, тусламж, үйлчилгээний чанар, үр дүнг тооцоход тогтмол ашигладаг болгоно.
6. Эмнэлгийн мэргэжилтний хандлага, харилцаа, ёс зүйн мэдлэг, ур чадварыг сайжруулах чиглэлээр ажлын байрны тасралтгүй сургалтыг эрчимжүүлнэ.
7. Эрүүл мэндийн байгууллагуудын үйлчилгээний уялдаа холбоо, тэдний ачаалал, хүлээгдэл, зохицуулалтын талаарх мэдээллийн цахим хуудсыг ажиллуулж, үйлчилгээний зохицуулалтыг сайжруулж, хүлээгдэл, чирэгдлийг бууруулна.

4. Засаглал, ил тод байдал

1. Эрүүл мэндийн салбарын хэмжээнд эмнэлгийн тусламж, үйлчилгээний асуудлаар бодлого боловсруулах, зохицуулах, тусламж, үйлчилгээг үзүүлэх, худалдан авах, хянах үүрэг, үйл ажиллагааг тодорхой болгож, засаглалын эрх, үүргийн давхцлыг арилгах чиглэлээр эрх зүйн зохицуулалтыг сайжруулна.
2. Бүх шатлалын эмнэлгийн удирдлагын багийг хамтын шийдвэр гаргах ур чадвар, соёлд сургах, хууль эрх зүйн хүрээнд бие даан шийдвэр гаргах чадавхийг бэхжүүлж, эрүүл мэндийн байгууллагуудын үр дүнтэй бөгөөд үр ашигтай ажиллах хөшүүргийг бий болгоно.
3. Эмнэлгийн тусламж, үйлчилгээг гүйцэтгэлийн гэрээний үндсэн дээр санхүүжүүлэх тогтолцоог бий болгож, эрүүл мэндийн байгууллагатай гэрээ байгуулах, гэрээний хэрэгжилтийг удирдах, хариуцлагыг хүлээх, хянах, үнэлэх, тайлагнах механизмыг бүрдүүлж, чадавхийг бэхжүүлнэ.
4. Төрийн болон орон нутгийн өмчийн эмнэлгүүдийг хувьчлалын аль нэг хэлбэрт шилжүүлэхгүйгээр эмнэлгийн засаглал, санхүүгийн удирдлагын үйл ажиллагааг олон нийт, үйлчлүүлэгчдэд нээлттэй, ил тод болгож, тэдний оролцоог хангаж, гүйцэтгэлийн болон санхүүжилтийн гэрээ байгуулах, түүнийг хянах үнэлэх, дүгнэх үйл ажиллагаанд үйлчлүүлэгчдийн төлөөллийг оролцуулах эрх зүйн орчинг боловсронгуй болгоно.
5. Тусламж, үйлчилгээний чанар, үр ашгийг сайжруулах зорилгоор хүний нөөц, санхүүгийн асуудлаар бие даан шийдвэрлэх эрх бүхий хагас бие даасан засаглалын хэлбэрийг орон нутгийн болон төрийн өмчийн зарим эмнэлгүүдэд туршиж, туршилтын үр дүнг харгалзан бусад эмнэлгүүдэд нэвтрүүлэх эсэх асуудлыг шийдвэрлэнэ.

5. Санхүүжилт, хөрөнгө оруулалт

1. Эрүүл мэндийн даатгалаас санхүүжүүлэх тусламж, үйлчилгээний багцыг үе шаттайгаар өргөжүүлж, эмнэлгийн тусламж, үйлчилгээний урсгал зардлын 70-аас доошгүй хувийг иргэний эрүүл мэндийн даатгалын сангаас санхүүжүүлдэг болгоно.
2. Хүн амын өсөлт, үндэсний аюулгүй байдалд сөргөөр нөлөөлөх, иргэний амь насанд аюул учруулах болон хүн амыг олноор хамрах өвчин эмгэгийн үед үзүүлэх эмнэлгийн тусламж, үйлчилгээний бодит зардлыг улсын төсөв болон эрүүл

мэндийн даатгалын сангаас хамтран санхүүжүүлэх боломжийг бүрдүүлэх асуудлыг холбогдох байгууллагуудтай хамтран шийдвэрлэнэ.

3. Санхүүгийн нөөцийг үйлчлэх хүрээний хүн амын тоо, хөдөлгөөнт хүн амын эзлэх хувь, газар нутгийн алслагдмал байдал, суурьшил, нягтрал, хүн амын өвчлөл, иргэдийн эрүүл мэндийн эрэлт хэрэгцээтэй уялдуулан хуваарилна. Тусламж үйлчилгээний төлбөрийн арга, зардлын хэмжээг олон улсын жишигт нийцүүлэн тусламж, үйлчилгээний төрөл, оношийн бүлэг, бодит өртөг, чанар, гүйцэтгэлтэй уялдуулан боловсронгуй болгоно.
4. Эрүүл мэндийн ажилтны ажлын ачаалал, гүйцэтгэл, хөдөлмөрийн бодит үнэлэмжид тулгуурласан цалин, урамшууллын тогтолцоог олон улсын чиг хандлагатай нийцүүлэн нэвтрүүлж, тогтвортой ажиллах нөхцлийг бүрдүүлнэ.
5. Эмнэлгийн тусламж, үйлчилгээнд шинэ техник, технологийг судлан нэвтрүүлэх, аюулгүй, үр ашигтай, хүнд болон хүрээлэн буй орчинд ээлтэй эсэхийг үнэлэх, техник, тоног төхөөрөмжийн ашиглалтын хяналт, тохиргоо, баталгаажуулалт хийх, засвар үйлчилгээг зохицуулах үндэсний түвшний чадавхийг бий болгож, хөгжүүлнэ.
6. Хөрөнгийн бүртгэлийн нэгдсэн мэдээллийн санг байгуулж, хүн амын өвчлөлийн чиг хандлага, эмнэлгийн тусламж, үйлчилгээний эрэлт хэрэгцээтэй уялдуулсан эмнэлгийн хөрөнгө оруулалтын ерөнхий төлөвлөгөөг хийх чадавхийг бий болгож, хөгжүүлнэ.
7. Төрийн болон орон нутгийн өмчийн эрүүл мэндийн байгууллагын өмчлөл, эд хөрөнгийн эзэмшил, түүний бүртгэл, ашиглалт, захиран зарцуулалтад тавих хяналт, хариуцлагыг сайжруулж, дотоод аудитын тогтолцоог бэхжүүлнэ.

6. Төр, хувийн хэвшлийн түншлэл

1. Эмнэлгийн тусламж, үйлчилгээнд өмчийн олон хэлбэрийн эмнэлгийн гүйцэтгэх үүрэг болон төр, хувийн хэвшлийн түншлэл, хамтын ажиллагааны зохистой хэлбэрийг тодорхойлох, зохицуулах чиглэлээр хууль, эрх зүйн орчинг сайжруулна.
2. Хувийн хэвшлийн эмнэлгийн мэргэжлийн үйл ажиллагаа эрхлэх тусгай зөвшөөрлийг өвчлөлийн чиг хандлага, төрийн болон орон нутгийн эмнэлгийн ачаалал, эмнэлгийн тусламж, үйлчилгээний тэргүүлэх чиглэл, эрэлт хэрэгцээний судалгаатай уялдуулна.
3. Хувийн хэвшлийн эмнэлгийн үйл ажиллагааны нэгдсэн мэдээллийн сан бүрдүүлж төр, хувийн хэвшлийн түншлэлийг сайжруулахад үр дүнтэй ашиглана.
4. Төрийн чиг үүрэгт хамаарах эмнэлгийн зарим тусламж, үйлчилгээг хувийн хэвшлийн эмнэлгийн чадамж, сонирхол, эдийн засгийн үр ашгийг харгалзан хувийн хэвшлийн байгууллагаар гэрээний үндсэн дээр гүйцэтгүүлнэ.
5. Төрийн болон орон нутгийн өмчийн эмнэлгийн дэд бүтэц байгуулах, ашиглахад төр, хувийн хэвшлийн түншлэлийн үр дүнтэй аргуудаас тохиромжтойг судлан нэвтрүүлж, гэрээний үндсэн дээр хамтран ажиллахыг дэмжинэ.



МОНГОЛ УЛСЫН
ЭРҮҮЛ МЭНДИЙН САЙДЫН ТУШААЛ

2014 оны 02 сарын 24 өдөр

Дугаар 58

Улаанбаатар хот

Ээлжийн амралт олгох
тухай

Монгол Улсын Хөдөлмөрийн тухай хуулийн 79 дүгээр зүйлийн 79.1, 79.5.5 дахь хэсэг, 2014 оны 01 дүгээр сарын 24-ний өдрийн өргөдлийг тус тус үндэслэн ТУШААХ нь:

1. Эрүүл мэндийн яамны Барилга захиалагчийн албаны дарга Ж.Нэргүйд 2014 оны 01 дүгээр сарын 28-ны өдрөөс эхлэн ажлын 26 хоногоор ээлжийн амралт олгосугай.
2. Ээлжийн амралтын мөнгийг зохих журмын дагуу тооцож олгохыг Барилга захиалагчийн албаны нягтлан бодогч /Ө.Ганчимэг/-д зөвшөөрсүгэй.

САЙД



Н.УДВАЛ